

Bedrifter vil formuesskatten til livs:

- Det handlar om overlevingsevna vår

FØRDE: Korleis påverkar formuesskatten dei lokale bedriftene våre? Det var tema under eit frukostmøte i Førde fredag.

INA CHRISTIN LØVSETH
ina.lovseth@firda.no

FIRDA: Kring 25 bedrifter var representerte under frukostmøtet som gjekk føre seg på Scandic Hotell i Førde fredag.

Tema var formuesskatt og korleis dette påverkar næringslivet, spesielt i mindre lokalsamfunn.

Til stades var også stortingsrepresentant og nestleiar i Venstre, Sveinung Rotevatn. Han sit også i finanskomiteen på Stortinget.

Vil ta familiebedrifta inn i framtida

Formuesskatten har vore her i mange år, men den er eit betydeleg større problem no enn før. Difor tok eg initiativ til å arrangere dette frukostmøtet, slik at bedriftene kunne møte og fortelje Sveinung Rotevatn om desse utfordringane, seier Atle Hamar (V).

Etter ein god frukost, var det sett av ein time til innlegg frå representantar frå næringslivet i Sunnfjord.

Blant desse var Andrea Fardal Opseth. Ho er dagleg leiar i Opseth Invest og styremedlem i Førde Sementvare. Bedrifta fylte nyleg 94 år og er ei av dei lengstlevande bedriftene i Førde. Opseth er fjerde generasjon Opseth i bedrifta.

– Det er med stoltheit at eg går inn i selskapet med mål om å forvalte verdiane slik dei er skapt. Men for å kunne halde fram å drive ei lokalt forankra familiebedrift inn i framtida, så er ein avhengig av stabile og gode rammevilkår.

Råker evna til å investere

Det Opseth og dei andre bedriftseigarane reagerer på, er nivået på skattane som dei er pålagde å betale. Og då særleg formuesskatten.

– Vi betalar formuesskatt ut ifrå verdiane på formuen vår. Vi investerer i selskapet for å gjere vilkåra betre for dei tilsette, det medfører at formuesskatten aukar. Problemet er òg at ein betalar skatt på pengar som nødvendigvis ikkje er opptent, og at ein må betale uansett om ein har hatt eit godt eller dårleg år.

Vidare peikar Opseth på at for



SKATT: – Det er viktig å belyse korleis formuesskatten påverkar lokaleigde bedrifter, seier Andrea Fardal Opseth i Opseth Invest.

FOTO: INA CHRISTIN LØVSETH



SKATT: Sveinung Rotevatn (t.v.) sette pris på innspela dei lokale bedriftene kom med knytt til formuesskatt. Her står han saman med Andrea Fardal Opseth i Opseth Invest, Leif Arne Åsen i Åsen & Øvrelid og Atle Hamar.

FOTO: INA CHRISTIN LØVSETH

å betale formuesskatten, må ein ta ut meir utbytte frå selskapet for å dekke auka formuesskatt. Når ein då i tillegg må skatte av utbytte ein tek ut, så blir skatten dei betalar samla sett langt høgare.

– Dette kan tære på selskapa sine reservar og i verste fall påverke overlevingsevna til bedriftene. Når ein må ta kapital ut frå selskapet for å betale formuesskatt, så påverkar det vår evne til å investere i- og utvikle selskapet vidare.

Eitt av få land

Norge er eitt av veldig få land i Europa som har formuesskatt. Eit selskap i Norge som til dø-

mes har svenske eigarar, treng ikkje betale formuesskatt.

– Det er tøffe tider for fleire bransjar no, og uavhengig av resultatane våre så må formuesskatten betalast. Dette påverkar også konkurransekrafta vår opp mot utlandslske bedriftseigarar, seier Opseth.

Fleire av dei framømte peika også på betydninga bedriftene har for lokalsamfunna, gjennom til dømes sponning av midlar til lokale idrettslag, kultur og andre arrangement. Ein konsekvens av formuesskatt, er at bedrifter ikkje vil klare å bidra i like stor grad som før.

– Eg er glad for at eg bur i velferdsstaten Norge, og eg betalar



DISKUTERTE FORMUESSKATT: Kring 25 bedrifter var representerte for å diskutere formuesskatt på Scandic Sunnfjord Hotell fredag.

FOTO: INA CHRISTIN LØVSETH

gledelig skatt. Men noko må gjerast med formuesskatten. Eksempelvis hadde det vore betre med auka selskapskatt. Då betalar bedriftene skatt ut ifrå opptente resultat.

– Gode innspel

Sveinung Rotevatn sette pris på alle innspela som kom fram under frukostmøtet.

Han synte forståing for utfordringane som bedriftene kjenner på som følge av formuesskatten, som har auka dei siste åra.

– Eg høyrer kva de seier, og dessverre er ikkje dette unikt. Dette er beskjedar vi har fått frå nesten alle bransjar i næringsli-

vet.

På spørsmål frå salen om kva Venstre vil gjere med formuesskatten dersom dei kjem i regjering ved neste val, svara han:

– Det har vi ikkje bestemt oss for enno, vi held på å diskutere programmet no. Vi kjem garantert til å redusere den, men kor langt skal vi gå? Eg skulle gjerne ha fjerna den heilt, men då må vi ha ein bevisst plan for korleis ein kan gjere opp for delar av inntektstapet til staten. Men eg har fått mange gode innspel her i dag for korleis dette kan takast vidare.